

Morning Dogri (NSD) National News Bulletin 10-06-2024

आकाशवाणी

1. प्रधानमंत्री नरेन्द्र मोदी होरें आखेआ जे उंदे त्रीये शासनकाल दरान बी भारत खित्ते दी शांति, खुशहाली ते प्रगति लेई कम्म करना जारी रखोग।
2. सिक्किम क्रांतिकारी मोर्चा दे नेता प्रेम सिंह तामांग अज्ज सिक्किम दे मुख्मन्त्री दे तौरा पर सगंध चुक्कगन।
3. बीजेपी ते केन्द्री मंत्री राजनाथ सिंह ते भूपेन्द्र यादव होरें गी ओडिशा च विधानमंडल पार्टी दा नेता चुनने लेई केन्द्री निगरान नियुक्त कीता ऐ।
4. रियासी जिले च इक मुश्तवा आतंकी हमले मगरा यात्री बस दे डूहूगी खाई च रूलकी जाने कारण 10 जनें दी मौत होई गई जदके 33 जनें घायल होई गे।
5. यूरोपी संसद वोट च अपने प्रतिद्वंदी नैशनल रैली दी मैरीन ली पेन दी बड्डी जित्त गी दिक्खदे होई फ्रांस दे राष्ट्रपति इमैनुअल मैक्रान होरें समें थमां पैहले संसदीय चुनां करोआने दी घोषणा करी दित्ती ऐ।
6. मर्दे दे आईसीसी टी-20 विश्व कप च जंदी रातीं न्यूयार्क दे नस्साउ काउंटी अंतर्राष्ट्रीय क्रिकेट स्टेडियम च खेड्डे गेदे मैच च भारत नै पाकिस्तान गी 6 रंजें कन्नै हराई दित्ता।

<><><><><><><><>

PM-World

प्रधानमंत्री नरेन्द्र मोदी होरें आखेआ जे भारत उंदे त्रीए कार्यकाल च खित्ते दी शांति, प्रगति ते समृद्धि लेई कम्म करना जारी रखोग। उंदे खित्ते च लोकें बश्कार आपसी सरबंध ते संपर्क बधाने दा आह्वान कीता। उनें कल रातीं राष्ट्रपति भवन च शपथ ग्रहण समारोह मगरा भारत दे गोआंढी मुख्खें ते हिंद महायागर क्षेत्र दे नेताएं कन्नै मलाटी दरान एह गल्ल आक्खी। प्रधानमंत्री होरें इनें नेताएं दा धन्नबाद करदे होई गोआंढी पैहले आली नीति ते सागर दृष्टिकोण प्रति भारत दी वचनबद्धता दोहराई। श्री मोदी हुंदे सगंध समारोह च मालद्वीप दे राष्ट्रपति मोहम्मद मइज्जू, नेपाल दे प्रधानमंत्री पुष्प कमल दहल "प्रचंड", श्रीलंका दे राष्ट्रपति रनिल विक्रमसिंघे, बंग्लादेश दी प्रधानमंत्री शेख हसीना, मॉरीशस दे प्रधानमंत्री प्रविंद कुमार जुगनाथ, भूटान दे प्रधानमंत्री शेरींग तोबगे ते सेशेल्स दे उपराष्ट्रपति अहमद अफीफ होर मजूद हे। सब्बनें लीडरें त्रीह बारी प्रधानमंत्री बनने उप्पर श्री मोदी होरें गी मुबारकबाद दित्ती। मगरा राष्ट्रपति द्रौपदी मुर्मू होरें कल रातीं राष्ट्रपति भवन च प्रधानमंत्री नरेन्द्र मोदी हुंदे शपथ ग्रहण समारोह च हिस्सा लैने आले गोआंढी मुख्खें दे लीडरें दे सम्मान च धाम दा आयोजन कीता।

<><><><><><><><>

Cabinet Meet

न्हीं केन्द्रीय कैबिनेट दी पैहली बैठक अज्ज होने दी मेद ऐ। एह बैठक संजा तगर लगने दी संभावना ऐ। कल प्रधानमंत्री नरेन्द्र मोदी ते उंदे नमें मंत्री परिषद नै औहदे दे सगंध लैती।

राष्ट्रपति द्रौपदी मुर्मू होरें राष्ट्रपति भवन च आयोजित इक समारोह च मोदी हुंदे कन्नै मंत्री परिषद दे सदस्यें गी औहदे ते राजदारी दी सगंध दोआई।

<><><><><><>

Sikkim Swearing

सिक्किम क्रांतिकारी मोर्चा दे लीडर प्रेम सिंह तामांग होरें गी सिक्किम दे मुखमन्त्री दे तौरा पर अज्ज सगंध चकाई जाग। शपथ ग्रहण समारोह गंगटोक दे पलजोर स्टेडियम च संजा 4 बजे होग। राज्यपाल लक्ष्मण प्रसाद आचार्य, श्री तामांग ते उंदी मंत्री परिषद गी औहदे ते राजदारी दी सगंध दुआगन। श्री तामांग होर दुए कार्जकाल लेई सगंध लैगन। शपथ ग्रहण समारोह गी दिक्खदे होई गैंगटोक नगर निगम इलाके दे अंदर सब्बै सरकारी ते निजी स्कूलें, कालेज ते शैक्षणिक संस्थान अज्ज बंद रौहगन। इस फैसले दा मकसद इस इलाके च सुरक्षा बंदोबस्तें गी निगगर करने ते गड्डिडए दी आओजाई पर रोक लाना ऐ। एसकेएम नै भारी बहुमत कन्नै सत्ता बरकरार रखीते विधानसभा च 32 सीटें चा 31 सीटें पर जित्त4 हासल कीती।

<><><><><><>

BJP Odisha

बीजेपी ते केन्द्री मंत्री राजनाथ सिंह ते भूपेन्द्र यादव होरें गी ओडिशा च विधानमंडल पार्टी दा नेता चुनने लेई केन्द्री निगरान नियुक्त कीता ऐ। बीजेपी नै इक ब्यान च आखेआ ऐ जे उंदे संसदीय बोर्ड नै इनें दौनें लीडरें गी राज्य च विधानमंडल पार्टी दे नेता दे चुनां दी निगरानी करने लेई चुनेआ ऐ।

<><><><><><>

Reasi Attack

रियासी जिले दे त्रेआट ग्रां कश आतंकी हमले च श्रद्धालुएं गी लेई जा'रदी इक बस डूहगी खाई च जाई पेई। हस हादसे च 10 लोकें दी मौत होई गई ते 33 होर घायल होई गे। बस शिवखोड़ी थमां कटरा जा'रदी ही। एसएसपी रियासी मोहित शर्मा होरें दस्सेआ जे बस दे डरैवर गी गोली लग्गी जेहडे मगरा ओहदा गड्डी पर काबू नेई रेआ। घायलें गी नेडे दे रियासी आले ते जम्मू दे अस्पताले च इलाज लेई लेता गेआ। राष्ट्रपति द्रौपदी मुर्मू होरें घटना पर दुख जताया। उनें श्रद्धालुएं गी लेइयै जा'रदी बस पर होए दे आतंकी हमले गी मनुक्खता प्रति अपराध दस्सेआ ते आखेआ जे एहदी सख्त लफ्जें च निंदेआ होनी लोडचदी। राष्ट्रपति होरें घायलें दे तौले नरोए होने दी कामना बी कीती ते आखेआ मुख पीडित परोआरें कन्नै मजबूती कन्नै खड़ोते दा ऐ। प्रधानमंत्री नरेन्द्र मोदी होरें बी हालात दी जानकारी लैती ते उपराज्यपाल मनोज सिन्हा होरें गी हालात पर लगातार तक्क रखने लेई आखेआ। उनें घायलें गी लोडचदी मैडिकल सहायता उपलब्ध करोआने लेई बी आखेआ। केन्द्रीय मंत्री अमित शाह होरें बी इस हमले दी निंदेआ कीती ऐ। उनें उपराज्यपाल ते पुलस महानिदेशक हुंदे कन्नै गल्ल कीती ते घटना दी जानकारी लैती। शाह होरें आखेआ जे इस हमले च शामिल लोकें गी बख्शेआ नेई जाग। केन्द्री मंत्री राजनाथ सिंह होरें इस हमले दी सख्त लफ्जें च निंदेआ कीती ते घायलें दे तौले नरोए होने दी कामना कीती।

<><><><><><><>

France

यूरोपी संसद वोट च अपने प्रतिद्वंदी नैशनल रैली दी मैरीन ली पेन दी बड्डी जित्त गी दिक्खदे होई फ्रांस दे राष्ट्रपति इमैनुअल मैक्रान होरें समें थमां पैहले संसदीय चुनां करोआने दी घोषणा करी दित्ती ऐ। एग्जिट पोल मूजब नैशनल रैली पार्टी गी 32 प्रतिशत वोट थोए। जेह्ड़े मैक्रान हुं दी रिनायसेंस पार्टी गी थोए दे वोटें दे मकाबले दो गुणे न। संसद गी भंग करने दी घोषणा करदे होई श्री मैक्रान होरें दऊं गेडें च मतदान दी घोषणा कीती, जेह्ड़े 30 जून ते 7 जुलाई गी करोआए जांगन।

<><><><><><><>

Weather

भारत दे मौसम विभाग नै गोवा, महाराष्ट्र ते कर्नाटक किश हिस्सें च भारी थमां मती भारी बरखा करी रैड अलर्ट जारी कीता ऐ। भारती मौसम विभाग नै इस मौसमी गड़बड़ी दी वजह मराठावाड़ा क्षेत्र उप्पर ऐठले क्षोभमंडलीय स्तर उप्पर चक्रवाती हलचल गी दस्सेआ ऐ। आईएमडी नै आखेआ ऐ जे अगले 3 शा 4 ध्याड़े दरान कर्नाटक, केरल, लक्षद्वीप ते आंध्रप्रदेश उप्पर गरजना, बिजली ते तेज ब्हाऊ कन्नै हल्की थमां मती बरखा होग। अगले 6 ध्याड़े दरान उत्तर-पूर्व भारत ते पच्छिम बंगाल च एह् हालात बने दे रौंहगन। पूर्वी ते मध्य भारत च बी अगले 4 दिनें दरान बिहार, झारखंड, ओडिशा, मध्यप्रदेश ते छत्तीसगढ़ च बी इस चाल्ली दी स्थिति बनी रौंहग। उआं पंजाब, बिहार, झारखंड, पच्छिम बंगाल, हिमाचल प्रदेश, उत्तराखंड, दिल्ली, राजस्थान ते मध्य प्रदेश दे किश हिस्सें च इस म्हीने दी 13 तरीक तगर गर्मी दा प्रकोप जारी रौंहग। अगले च दिनें दरान उत्तर-पच्छिम ते मध्य भारत च 2 थमां 3 डिग्री सैल्सियस दा बाद्धा होई सकदा ऐ।

<><><><><><><>

T-20 Cricket

न्यूयार्क च टी-20 क्रिकेट विश्व कप च कल खेड्ड़े गेदे इक रोमांचक मकाबले च भारत नै पाकिस्तान गी 6 रंजें कन्नै हराई दित्ता। पैहले बल्लेबाजी करदे होई भारत दी टीम 19 ओवरें च 119 रंज पर गै आउट होई गई। परते च 120 रंजें दे लक्ष्य दा पिच्छा करदे होई पाकिस्तान दी टीम 20 ओवरें च शडे 113 रंज गै बनाई सकी। जसप्रीत बुमराह दी शानदार गेंदबाजी करियै प्लेयर ऑफ द मैच घोषत कीता गेआ।

<><><><><><><>

French Open

स्पेन दे कार्लोस अल्काराज नै अपना पैहला फ्रेंच ओपन दे मर्दे दे सिंगल्स खताब गी जंदी रातीं पेरिस च जित्ती लैता। पुरुष एकल फाइनल च अल्काराज नै जर्मनी दे एलेकजेंडर ज्वेदेव गी 6-3, 2-6, 5-7, 6-1 ते 6-2 कन्नै हराया।

<><><><><><><>